

**НЕДЕЛЯ, В НЮЖЕ ЧТЕТСЯ СВЯЩЕННОЕ И СВЯТОЕ ЕВАНГЕЛИЕ,
ПРИТЧИ БЛУДНАГО СЫНА.**

В субботу вечера на бдении, по обычном стихословии,

На Господи воззвах, поставим стихов 10, и поем стихиры Осмогласника воскресны 3, и анатolieвы 3, и Троицы 4, повторяюще сия. Глас 1.

В безгрешную страну * и животную вверихся, * посеяв грех, * серпом пожав класы лености, * и рукоятнем связав деяний моих снопы, * яже и постлах не на гумне покаяния: * но молю Тя превечнаго делателя нашего Бога, * ветром Твоего любоблагодутробия * развеи плеву дел моих, * и пшеницу даждь души моей оставление, * в небесную Твою затворяя мя житницу, и спаси мя. [Дважды]

Познаим братие, * таинства силу, * от греха бо ко отеческому дому востекшаго блуднаго сына * преблагий отец предустрет лобзает, * и паки своя славы познание дарует: * и таинственное вышним совершает веселие, * закалая тельца упитаннаго, * да мы достойно сожителствуем, * заклавшему же человеколюбному Отцу * и славному заколению, * Спасу душ наших.

Слава, глас 2:

О коликих благ окаянный себе лиших! * О какова Царствия отпадох страстный аз! * Богатство изнурил, * еже приях заповедь преступих. * Увы мне, страстная душе! * Огню вечному прочее осудишися. * Темже прежде конца возопий Христу Богу * яко блуднаго * приими мя сына, Боже, и помилуй мя.

И ныне: Богородичен, гласа.

Вход. Свете тихий: Прокимен: Господь воцарися:

На литии по обычаю стихира храма.

Слава, глас 4:

Яко блудный сын приидох * и аз Щедре, * житие все иждивый во отшествии. * Расточих богатство, * еже дал еси мне Отче: * приими мя кающася Боже, * и помилуй мя.

И ныне, Богородичен глас 4:

Призри на моления Твоих раб, Всенепорочная, * утоляющи лютая на ны востания, * всякия скорби нас изменяющи. Тя бо Едину, * твердое и известное Утверждение имамы, * и Твое предстательство стяжахом, * да не постыдимся, Владычице, * Тя призывающи, потщися на умоление Тебе верно вопиющих: * радуйся, Владычице, * всех Помоще, Радосте и Покрове, * и Спасение душ наших.

На стиховне Осмогласника, по алфавиту.

Слава, самогласен, глас 6:

Отеческаго дара расточив богатство, * с безсловесными скоты пасохся
окаянный, * и тех желая пищи, * голодом таях не насыщаяся, * но возвратився к
благоутробному Отцу, * взываю со слезами: * прими мя яко наемника *
припадающа человеколюбию Твоему * и спаси мя.

И ныне, Богородичен глас 6:

Творец и Избавитель мой, Пречистая, * Христос Господь, * из Твоих
ложесн прошед, * в мя Оболкийся, * первыя клятвы Адама свободи. * Темже Ти,
Всечистая, * яко Божии Матери же и Деве воистинну, * вопием немолчно: *
радуйся Ангельски, * радуйся, Владычице, * Предстательство и Покрове * и
Спасение душ наших.

Отпустительный: Богородице Дево: трижды.

И прочее последование бдения, яко обычно.

НЕДЕЛЯ ПРИТЧИ БЛУДНАГО СЫНА.

НА УТРЕНИ,

На **Бог** Господь, тропарь Осмогласника воскресен, и Богородичен, обычное стихословие, и полиелей.

Обычныя два псалма: припеваем же к сим и третий псалом: На реках Вавилонских: со аллилуиею красною.

Степенны, и прокимен гласа. Всякое дыхание: Евангелие утреннее. Таже,

Слава, глас 8: Покаяния отверзи ми двери Жизнодавче, * утренюет бо дух мой ко храму святому Твоему, * храм носяй телесный весь осквернен: * но яко щедр, очисти * благоутробною Твоею милостию.

И ныне, Богородичен: На спасения стези настави мя Богородице, * студными бо окалях душу грехми, * и в лености все житие мое иждих: * но Твоими молитвами * избави мя от всякия нечистоты.

Таже, глас 6: Помилуй мя Боже, * по велицей милости Твоей, * и по множеству щедрот Твоих, * очисти беззаконие мое.

Множества содеянных мною лютых, * помышляя окаянный, * трепещу страшнаго дне суднаго: * но надеяся на милость благоутробия Твоего, * яко Давид воишу Ти: * помилуй мя Боже по велицей Твоей милости.

Канон воскресен, со ирмосом на 4, и крестовоскресный на два, и Богородицы на два, и Триоди на 6. Минеи же последование поем на Повечерии, в пяток вечера.

Канон, творение господина Иосифа. Глас 2:

Песнь 1:

Ирмос: Моисейскую песнь восприимши * возопий душе: * Помощник и Покровитель бысть мне во спасение: * Сей мой Бог, * и прославлю Его.

Исусе Боже, кающася прими ныне и мене, яко блуднаго сына, все житие в лености живша, и Тебе прогневавша.

Еже ми дал еси прежде, зле расточих Божественное богатство, удалихся от Тебе, блудно жив: благоутробне Отче, прими убо и мене обращающася.

Слава: Объятия ныне Отеческая простер, прими Господи и мене, якоже блуднаго, Всещедре, яко да благодарно прославлю Тя.

Богородичен: На мне Боже, всю показав благостыню, презри моих множество согрешений, яко благодетель, божественными Матере Твоя мольбами.

Катавасии же поем ирмосы канона. Моисейскую песнь восприимши * возопий душе: * Помощник и Покровитель бысть мне во спасение: * Сей мой Бог, * и прославлю Его.

Песнь 3:

Ирмос: **Неплодствовавший мой ум, * плодоносен Боже покажи ми, * делателю добрых, * насадителю благих, * благоутробием Твоим.**

Весь вне быв себе, умовредно прилепихся страстей обретателем: но прими мя Христе, якоже блуднаго.

Блуднаго гласу поревновав, вопию: согреших, Отче, якоже онаго убо, и мене обыми ныне, и не отрини мене.

Слава: **Объятия Твоя простер Христе, милостивно прими мя, от страны дальных греха и страстей обращающа.**

Богородичен: **Д**обрая в женах, обогати и мене добрых виды, грехи многими обнищавшаго Чистая, яко да славлю Тя.

Катавасия: **Неплодствовавший мой ум, * плодоносен Боже покажи ми, * делателю добрых, * насадителю благих, * благоутробием Твоим.**

Седален, глас 1.

Подобен: Гроб Твой:

Объятия Отча отверсти ми потщися, * блудно иждих мое житие, * на богатство неизживаемое * взирай щедрот Твоих Спасе, * ныне обнищавшее мое сердце не презри. * Тебе бо Господи, * во умилении зову: * согреших, Отче, на небо * и пред Тобою.

Слава, тойже. И ныне, Богородичен. Подобен:

Безвестная Чистая Богородице Дево, * едина верных предстательнице и покрове, * бед и скорбей, * и лютых обстояний, всех свободи, * на Тя надежды Отроковице имущих, * и души наша спаси божественными молитвами Твоими.

Песнь 4:

Ирмос: **Еже от Девы Твое Рождество пророк предзря, * возпроповедаше вопия: * слух Твой услышах и убояхся: * яко от юга, * и из горы святыя, * приосененныя пришел еси Христе.**

Богатство благих, еже дал ми еси Небесный Отче, расточих зле, странным гражданином порабощен. Темже вопию Ти: согреших Ти, прими мя яко блуднаго древле, простер объятия мне Твоя.

Всякой злобе поработихся, приникнув окаянно страстей делателем, и себе вне бых несмотрением, ущедри мя Спасе, Пренебесный Отче, прибегающа ко многим Твоим щедротам.

Слава: **В**сякаго студа исполнихся, не смея воззрети на высоту небесную: ибо безсловесно приникнув греху, ныне же обращаю вопию умилением: согреших Ти, прими мя Всецарю.

Богородичен: Человеком помощи, упование твердое всем христианом, прибежище Чистая спасаемым: спаси мя Дево, матерними Твоими мольбами, и будущия жизни сподоби.

Катавасия: Еже от Девы Твое Рождество пророк предзря, * возпроповедаше вопия: * слух Твой услышах и убояхся: * яко от юга, * и из горы святяя, * приосененныя пришел еси Христе.

Песнь 5:

Ирмос: Нощи прешедшей, * приближися день и свет миру возсия: * сего ради хвалят Тя ангельстии чини, * и славословят Тя вся всяческая.

Поработихся гражданином странным, и в страну тлетворную отыдох, и исполнихся студа: ныне же обращая зову Ти Щедре, согреших.

Отеческая Твоя благоутробия ныне отверзи ми, от злых обратившуся, Небесный Отче, и не отрини мене, имеяй премногую милость.

Слава: Не смею воззрети горе на высоту, без числа Христе прогнав Тя: но ведый Твоя щедроты милостивныя, зываю: согреших Ти, очисти, и спаси мя.

Богородичен: Всесвятая Дево благодатная, очищение всем рождающая, моих согрешений тяжкое бремя Твоими молитвами облегчи.

Катавасия: Нощи прешедшей, * приближися день и свет миру возсия: * сего ради хвалят Тя ангельстии чини, * и славословят Тя вся всяческая.

Песнь 6:

Ирмос: Во глубине греховней содержимь есмь Спасе, * и в пучине житейстей обуреваемь: * но якоже Иону от зверя, * и мене от страстей возведи, * и спаси мя.

Глубина согрешений содержит мя присно, и треволение грехов погружает мя: окорми мя ко пристанищу жизни, Христе Боже, и спаси мя Царю славы.

Богатство Отеческое расточих люте, и обнищав студа исполнихся, поработен неплодными помышленьми. Темже Ти вопию: Человеколюбче ущедри, и спаси мя.

Слава: Гладом истаявша всяких благ, и устранившася от Тебе Всеблагий, ущедри обращающаяся мя ныне: и спаси Христе, поюща Твое человеколюбие.

Богородичен: Спаса и Владыку рождающая Христа, спасения мя Отроковице сподоби, обнищавша от всяких благ, Дево Чистая, да пою Твоя величия.

Катавасия: Во глубине греховней содержимь есмь Спасе, * и в пучине житейстей обуреваемь: * но якоже Иону от зверя, * и мене от страстей возведи, * и спаси мя.

Кондак, глас 3.

Подобен: Дева днесь:

Отеческия славы Твоя удалихся безумно, * в злых расточив еже ми предал еси богатство. * Темже Ти блуднаго глас приношу: * согреших пред Тобою Отче щедрый, * прими мя кающася, * и сотвори мя яко единого от наемник Твоих.

Икос: Спасу нашему на всяк день учащу Своим гласом, писания услышим о блудном, и целомудренном паки. И сего верою подражаем доброе покаяние, ведущему тайная всех, смирением сердца воззовем согрешихом Ти Отче щедрый, и никогдаже достойни есмы нарецися чада, якоже прежде. Но яко естеством сый человеколюбив, Ты прими, и сотвори мя яко единого от наемник Твоих.

И бывает чтение прежде синаксаря в Минеи: также в Троице по чину.

В сий день блуднаго сына воззвание празднуем, еже божественнии отцы наши второе в Троице учиниша, вины ради сицевыя. Понеже бо суть нещны многая безместная в себе сведуще, блудне же зело от юнаго возраста живуще, и пьянствы, и нечистотами упражняющесе, и во глубину злых сице впадше, во отчаяние приходят, еже убо рождение есть гордости: и отсюда к попечению добродетели никакоже приходити хотят, и злых узы предлагающе, темже и горшим злым присно впадают. Человеколюбно и отчески святии отцы, и к такому человеку имуще, и отвести от отчаяния хотяще такую притчу zde по первой учиниша, отчаяния страсть из корене востерзающе, и к добродетели восприятию возставляюще, и человеколюбная и преблагая Божия благоутробия множае согрешившим, блудным показующе: яко ничтоже есть от грехов, еже Его человеколюбный разум победит, от сея притчи Христовы сие представляюще. Два убо сына суть человека, сиречь, Богочеловека Слова, праведнии и грешнии. Старейший убо есть, в заповедех Божиих, и во благом Его присно пребываяй, и никогдаже от Него отступаяй. Юный же, грех возлюбивый, и с Богом сопребывания студными делы отрекийся, и о нем Божие человеколюбие иждив, блудне поживый: яко еже по образу цело не соблюдаяй, и лукавому демону последовавший и работавый сластьми онаго хотением, и не возмог желание исполнити. Несытная бо вещь грех, согревающий обычаем, ради временнаго наслаждения: егоже и рожцем уподобляет, яко свиниям сущая пища. Рожцы бо, перее убо сладко нечто предлагают: последи же жестоко нечто, и аки плевы бывают, яже весьма стяжа и грех. Едва убо возбнув блудный, яко голодом добродетели погибая приходит ко Отцу глаголя: Отче, согреших на небо и пред Тобою, и несмы достоин нарецися сын Твой. Той же приемлет сего кающася, не поношая, но раскрылся и обымая, Божественныя и отческия утробы показывает. И дает ему одежду, сиречь, святое крещение, и печать и обручение, благодать Всесвятаго Духа. К сим же и сапоги, да не ктому от змиев и скорпий уязвятся по Богу его стопы: но наипаче оных главы сокрушити возмогут. Потом же презельнейшею радостию и тельца упитаннаго его ради

закаляет, Сына Своего Единороднаго, Отец и плоти Его дает причаститися, и крови. И аще чудяся старейший сын пребезчисленному Его милосердию, глаголет, елико убо и рече. Человеколюбец же, и онаго молчати творит, вводя тихими словеса, и кроткими и любезными: ты всегда со Мною еси, глаголя, и порадоватися подобаше, и Отцу спирствовать, яко сын Мой сей мертв быше грехом прежде, и оживе, раскаявся о нихже деяше безсловесных: и погибший, яко далече Ми быв обычаем сластей, и обретеса Мною, милосердием Своим пострадавшим, и милостивным нравом призвавшим его. Может же притча сия и к людем еврейским, и к нам взятися. Сея убо ради вины и притча сия зде от святых отец учинися: востерзающе убо, якоже речеса, отчаяние и боязнь, еже добрым делом касатися: поущающе же в покаяние и раскаяние, иже яко блуднаго согрешивша: еже убо и оружие есть величайшее, во отгнание сопротивнаго стрел, и поможение крепкое. Неизреченным человеколюбием Твоим Христе Боже наш помилуй нас, аминь.

Песнь 7:

Ирмос: Херувимы подражающе отроцы в печи * ликовствоваху вопиюще: * благословен еси Боже, * яко истинною и судом навел еси * сия вся грех ради наших, * препетый, и препрославленный * во вся веки.

Сладостем телесным приклонихся всеокаянно, и поработихся весьма страстным изобретением, и странен бых от Тебе Человеколюбче. Ныне же зову блуднаго гласом: согреших Христе, не презри мене, яко един милостив.

Взываю, согреших, никакоже воззрети дерзая на высоту небесную Всецарю, яко в безумии един Тя прогневах, отвергся Твоих повелений: темже яко един Благий, не отвержи мене от Твоего лица.

Слава: Апостол, Господи, и пророк, и преподобных, и честных мученик, и праведных мольбами прости ми вся, яже согреших, прогневав Христе благодать Твою: яко да песнословлю Тя во вся веки.

Богородичен: Херувим явльшися, и серафим Богородице, и всех светлейшая небесных воинств, с сими умоли, Егоже воплотила еси Божественное Слово Всенепорочная, Безначальнаго Отца, яко да благ вечнующих вси сподобимся.:

Катавасия: Херувимы подражающе отроцы в печи * ликовствоваху вопиюще: * благословен еси Боже, * яко истинною и судом навел еси * сия вся грех ради наших, * препетый, и препрославленный * во вся веки.

Песнь 8:

Ирмос: В купине Моисею Девы чудо, * на Синайстей горе, * прообразившаго иногда, пойте, * благословите и превозносите во вся веки.

Спешдый на землю спасти мир, вольною ницетою за милосердие многое, обнищавшаго мя ныне от всякаго благодаяния, яко милостивый, спаси.

От Твоих заповедей удавился, поработихся всеокаянно лестцу: обращающагося же ныне, яко блуднаго древле припадающа Тебе, прими Пренебесный Отче.

Благословим Отца, и Сына, и Святаго Духа, Господа.

Тлетворными помышленьми объемя омрачихся, и от Тебе удалихся, весь вне себе быв Щедре. Темже в покаянии припадающа Тебе спаси.

Богородичен: Богородительнице Чистая, низверженных исправление едина, исправи и мене всякими грехами сокрушеннаго всего и смиреннаго.

Таже: Хвалим, благословим, покланяемся Господеви:

Катавасия: В купине Моисею Дева чудо, * на Синайстей горе, * прообразившаго иногда, пойте, * благословите и превозносите во вся веки.

Песнь 9:

Ирмос: От земнородных кто слыша таковое? * Или кто виде когда, яко Дева обретется * во чреве имущая, * и безболезненно Младенца порождающая? * Таковое Твое чудо, * и Тя Чистая Богородице величаем.

Виждь Христе печаль сердца, виждь мое обращение, виждь слезы Спасе, и не презри мене: но обыми паки благоутробия ради, множеству спасаемых Пречистая, яко да пою благодарно милости Твоя.

Яко разбойник вопию: помяни мя, яко мытарь умилихся, бию в перси, и зову ныне: очисти, якоже блуднаго прими мя Всещедрый, от всех зол моих Всецарю: яко да пою Твое крайнее низхождение.

Воздохни ныне душе моя всеокаянная, и возопий Христу: мене ради волею обнищавый Господи, обнищавшаго мя от всякаго благоденствия, добрых богатством яко Благий и Многомилостивый един обогати мя.

Слава: Еже иногда соделал еси веселие блуднаго, Блаже, обращением вольным: сие ныне сотвори и на мне окаянном, простирая ми честная Твоя объятия: да спасся песнословлю крайнее Твое низхождение.

Богородичен: Светлыми молитвами Твоими Дево, мысленная моя очеса омраченная злобою, просвети, молюся, и к путем покаяния введи мя: яко да должно Тя песнословлю, паче слова Слово воплотившую.

Катавасия: От земнородных кто слыша таковое? * Или кто виде когда, яко Дева обретется * во чреве имущая, * и безболезненно Младенца порождающая? * Таковое Твое чудо, * и Тя Чистая Богородице величаем.

Ексапостиларий Осмогласника: таже настоящий Троици.

Подобен: Жены услышите:

Богатство, еже ми дал еси, благодати, окаянный отшед, непотребно зле иждих, Спасе, блудно пожив, демоном льстивно расточих. Темже мя обращающаяся, якоже блуднаго прими, Отче щедрый, и спаси.

Иный, подобен: Расточих богатство Твое иждив, Господи, и лукавым демоном повинухся окаянный: но Спасе Всеблагоутробне, блуднаго ущедри, и осквернишася очисти, первую отдай мне одежду Твоего Царствия.

Богородичен, подобен: Святая Мати Дево, велие проповедание апостолов, мучеников, и пророков, и преподобных, Твоего Сына и Господа умилостиви нам рабом Твоим Богородительнице, егда сядет судити по достоянию коегождо.

На хвалитех стихирь Осмогласника воскресны, 4: и аномалиев, 1:

И Троици самогласны, 3. Глас 2.

Блуднаго глас приношаю Ти, Господи: * согреших пред очима Твоима Благий, * расточих богатство Твоих дарований. * Но прими мя кающася Спасе, * и спаси мя.

Глас 4. Стих: Воскресни Господи Боже мой, да вознесется рука Твоя * не забуди убогих Твоих до конца.

Яко блудный сын приидох и аз Щедре, * житие все иждивый во отшествии: * расточих богатство, еже дал ми еси Отче: * прими мя кающася Боже, * и помилуй мя.

Глас 8: Стих: Исповемся Тебе Господи всем сердцем моим * повем вся чудеса Твоя.

Иждих блудно Отческаго имения богатство, * и расточив, пуст бых, * в страну вселився лукавых граждан, * и ктому не терпя с ними сожителства, * обращахся воию Ти щедрому Отцу: * согреших на небо и пред Тобою, * и несмы достоин нарецихся сын Твой: * сотвори мя яко единого от наемник Твоих Боже, * и помилуй мя.

Слава, глас 6:

Отче Благий, удалихся от Тебе, * не остави мене, * ниже непотребна покажи Царствия Твоего: * враг вселукавый обнажи мя и взят мое богатство, * душевная дарования блудно расточих. * Востав убо обращахся к Тебе воию: * сотвори мя яко единого от наемник Твоих: * мене ради на Кресте пречисти Твои руке прострый, * да лютаго зверя исхитиши мя, * и в первую одежду облечеши мя, * яко един Многомилостив.

И ныне: Препоблагословенна еси Богородице Дево:

Славословие великое. ектении, и отпуст. И обычно лития, на нейже поется

Слава, и ныне: стихира евангельская: и чтутся оглашения. И час первый в притворе. И совершенный отпуст.

НЕДЕЛЯ ПРИТЧИ БЛУДНАГО СЫНА.

На Литургии

Блаженна Осмогласника, На 6: И Триоди Песнь 6-я, На 4:

Глубина согрешений содержит мя присно, и треволение грехов погружает мя: окорми мя ко пристанищу жизни, Христе Боже, и спаси мя Царю славы.

Богатство Отеческое расточих люте, и обнищав студа исполнихся, порабощен неплодными помышленьми. Темже Ти вопию: Человеколюбче ущедри, и спаси мя.

Слава: Гладом истаявша всяких благ, и устранившася от Тебе Всеблагий, ущедри обращающаяся мя ныне: и спаси Христе, поюща Твое человеколюбие.

И ныне: Богородичен: Спаса и Владыку рождающая Христа, спасения мя Отроковице сподоби, обнищавша от всяких благ, Дево Чистая, да пою Твоя величия.

Прокимен Апостола по гласу.

Апостол к Коринфяном, зачало 135. [1 Кор. 6, 12 – 20.]

Братие, вся ми леть суть, но не вся на пользу: вся ми леть суть, но не аз обладаю буду от кого. Брашна чреву, и чрево брашном, Бог же и сие и сия упразднит. Тело же не блужению, но Господеви, и Господь телу. Бог же и Господа воздвиже, и нас воздвигнет силою Своею. Не весте ли, яко телеса ваша удове Христовы суть? Взем ли убо уды Христовы, сотворю уды блудничны? Да не будет. Или не весте, яко прилепляясь сквернодейце, едино тело есть с блудодейцею? Будета бо, рече, оба в плоть едину. Прилепляясь же Господеви, един дух есть с Господем. Бегайте блудодеяния: всяк бо грех, егоже аще сотворит человек, кроме тела есть, а блудяй, во свое тело согрешает. Или не весте, яко телеса ваша храм живуцаго в вас Святаго Духа суть, Егоже имате от Бога, и несте свои? Куплени бо есте ценою. Куплени бо есте ценою. Прославите убо Бога в телесех ваших и в душах ваших, яже суть Божия.

Аллилуиа гласа.

Евангелие от Луки, зачало 79. [Лк. 15, 11 – 32.]

Рече Господь притчу сию: человек некий име два сына. И рече юнейший ею отцу: отче, даждь ми достойную часть имения. И раздели има имение. И не по мнозех днех собрав все мний сын, отиде на страну далече, и ту расточи имение свое, живый блудно. Изжившу же ему все, бысть глад крепок на стране той, и той начат лишатися. И шед прилепился единому от жителей тоя страны, и посла его на села своя пасти свиния. И желаше насытити чрево свое от рожец, яже ядяху свиния, и никтоже даяше ему. В себе же пришед, рече: колико

наемником отца моего избывают хлебы, аз же гладом гиблю? Востав иду ко отцу моему, и реку ему: отче, согреших на небо и пред тобою, и уже несмь достоин нарещися сын твой, сотвори мя яко единого от наемник твоих. И востав иде ко отцу своему. Еще же ему далече сущу, узре его отец его, и мил ему бысть, и тек нападе на выю его, и облобыза его. Рече же ему сын: отче, согреших на небо и пред тобою, и уже несмь достоин нарещися сын твой. Рече же отец к рабом своим: изнесите одежду первую и облецыте его, и дадите перстень на руку его и сапоги на нозе, и приведше телец упитанный заколите, и ядше веселимся. Яко сын мой сей мертв бе, и оживе, и изгибл бе, и обретеса. И начаша веселитися. Бе же сын его старей на селе, и яко грядый приближися к дому, слыша пение и лики. И призвав единого от отрок, вопрошаше: что убо сия суть? Он же рече ему, яко брат твой прииде, и закла отец твой телца упитанна, яко здрава его прият. Разгневался же, и не хотяше внити. Отец же его изшед моляше его. Он же отвещав рече отцу: се, толико лет работаю тебе и николиже заповеди твоя преступих, и мне николиже дал еси козляте, да со други своими возвеселился бых. Егда же сын твой сей, изядый твое имение с любодейцами, прииде, закла еси ему телца питомага. Он же рече ему: чадо, ты всегда со мною еси, и вся моя твоя суть. Возвеселити же ся и возрадовати подобаше, яко брат твой сей мертв бе, и оживе, и изгибл бе, и обретеса.

Причастен: Хвалите Господа с Небес:

Подобает ведати, яко в седмице мясопустной Аллилуиа не поем: оставляем же и едину кафисму Псалтира от Утрени, и глаголем сию на Вечерни. Песней во Псалтири не глаголем. Не поется же и междочасие, и канон молебный Пресвятей Богородице, поемый на Повечерии: Повечерие же поется малое: Такожде творим в седмице сырной, разве среды и пятка: но о сем всем тамо указа ищи. Прочитаем же в сей недели в койлюбо день на Утрени слово святаго Макариа о Четырдесятнице, и Пятьдесятнице, егоже начало: Чадца моя, радуется сердце мое вас ради:

Ведомо же да есть, яко последование прилучающихся святых в субботу, и в Неделю мясопустную, поется в мимошедших Повечериях. Такожде о субботе и Неделе сырнопустной творим: или како настоятель изволит, кроме аще где случится великаго святаго память.